# 入菩薩行論

#### 寂天菩薩 論 如る法師 譯

- 1. 法身善逝佛子伴,及諸應敬我悉禮; 今當依教略宣說,佛子律儀趨行方。
- 此論未宣昔所無,詩韻吾亦不善巧, 是故未敢言利他,爲修自心撰此論。
- 循此修習善法故,吾信亦得暫增長; 善緣等我諸學人,若得見此容獲益。

## 第一品 菩提心利益

- 4. 暇滿人身極難得,既得能辦人生利, 倘若今生利未辦,後世怎得此圓滿?
- 猶於烏雲暗夜中,刹那閃電極明亮;如是因佛威德力,世人暫萌修福意。
- 6. 以是善行恆微弱,罪惡力大極難堪, 捨此圓滿菩提心,何有餘善能勝彼?
- 7. 佛於多劫佛深思惟,見此覺心最饒益。 無量眾生依於此,順利能獲最勝樂。
- 8. 欲滅三有百般苦,及除有情眾不安, 欲享百種快樂者,恆常莫捨菩提心。
- 9. 生死獄繋苦有情,若生真實菩提心, 即刻得名諸佛子,世間人天應禮敬。
- 10. 猶如最勝冶金料, 垢身得此將轉成, 無價之實佛陀身;故應堅持菩提心。
- 11. 眾生導師以慧觀,徹見彼心極珍貴; 諸欲出離三界者,宜善堅持菩提心。
- 12. 其餘善行如芭蕉,果實生已終枯槁; 菩提心樹恆生果,非僅不盡反增茂。

- 13. 如人雖犯極重罪,然依勇士得除畏; 若有速令解脱者,畏罪之人何不依?
- 14. 菩提心如劫末火,刹那能毀諸重罪。 智者彌勒諭善財:覺心利益無限量。
- 15. 略攝菩提心,當知有二種:願求菩提心、趣行菩提心。
- 16. 如人盡了知,欲行正行别;如是智者知,二心次第别。
- 17. 願心於生死,雖生廣大果,猶不如行心,相續增福德。
- 18. 何時爲度盡 無邊眾有情,立志不退轉,受持此行心;
- 19. 即自彼時起,縱眠或放逸,福德相續生,量多等虛空。
- 20. 爲信小乘者,妙臂問經中,如來自故說;其益極應理。
- 21. 若僅思療癒 有情諸頭疾,具此饒益心,獲福無窮盡。
- 22. 況欲除有情 無量不安樂,乃至欲成就 有情無量德。
- 23. 是父抑或母, 誰具此心耶? 是仙或欲天, 梵天有此耶?
- 24. 彼等為自利,尚且未夢及,況為他有情,生此饒益心?
- 25. 他人為自利,尚且未能發;生此珍貴心,稀有誠空前!
- 26. 珍貴菩提心,眾生安樂因,除苦妙甘霖,其福何能量?
- 27. 僅思利眾生, 福勝供諸佛; 何況勤精進 利樂諸有情。
- 28. 眾生欲除苦, 奈何苦更增, 愚人雖求樂, 毀樂如滅仇。
- 29. 於諸乏樂者 多苦諸眾生,足以眾安樂,斷彼一切苦,
- 30. 更復盡其癡;寧有等此善? 安得似此友? 豈有如此福?
- 31. 若人酬恩施,尚且應稱讚;何況未受託,菩薩自樂爲。
- 32. 偶備微劣食, 嗟施少眾生, 令得半日飽, 人敬為善士。
- 33. 何況恆施與 無邊有情眾,善逝無上樂,滿彼一切願。
- 34. 博施諸佛子,若人生惡心,佛言彼墮獄,久如心數劫。
- 35. 若人生淨信,得果較前增;佛子雖逢難,善增罪不生。
- 36. 何人生此心,我禮彼人身!誰令怨敵樂,歸敬彼樂源!

#### 第二品 懺悔罪業品

- 1. 爲持珍寶心,我今供如來、無垢妙法寶、佛子功德海。
- 2. 鮮花與珍果,種種諸良藥,世間珍寶物,悅意澄淨水;
- 3. 巍巍珍寶山,靜謐宜人林,花嚴妙寶樹,珍果垂枝樹;
- 4. 世間妙芳香、如意妙寶樹,自生諸莊稼,及餘諸珍飾;
- 5. 蓮綴諸湖泊,悦吟美天鵝,浩瀚虚空界,一切無主物,
- 6. 意緣敬奉獻 牟尼諸佛子。祈請勝福田,悲愍納吾供!
- 7. 福薄我貧窮,無餘堪供財;祈求慈怙主,利我受此供!
- 8. 願以吾身心,恆獻佛佛子!懇請哀納受,我願爲尊僕!
- 9. 尊既慈攝護,利生無怯顧,遠罪淨身心,誓斷諸惡業!
- 10. 馥郁一淨室,晶地亮瑩瑩,寶柱生悦意,珠蓋頻閃爍;
- 11. 備諸珍寶瓶,盛滿妙香水,洋溢美歌樂;請佛佛子浴。
- 12. 香薰極潔淨 浴巾拭其身,拭已復獻上 香極妙色衣。
- 13. 亦以細柔服、最勝莊嚴物,莊嚴普賢尊、文殊觀自在。
- 14. 香遍三千界 妙香塗敷彼 猶如純鍊金,發光諸佛身。
- 15. 放諸勝供處,供以香蓮花、曼陀青蓮花,及諸妙花鬘。
- 16. 亦獻最勝香,香溢結香雲;復獻諸神饈,種種妙飲食。
- 17. 亦獻金蓮花 齊列珍寶燈,香敷地面上,散佈悦意花。
- 18. 廣廈揚讚歌,懸珠耀光澤,嚴空無量飾,亦獻大悲主。
- 19. 金柄撐寶傘,周邊綴美飾,形妙極莊嚴;常展供諸佛。
- 20. 别此亦獻供 悦耳美歌樂,願息有情苦,樂雲常住留!
- 21. 惟願珍寶花 如雨續降淋 一切妙法寶、靈塔佛身前!
- 22. 猶如妙吉祥 昔日供諸佛,吾亦如是供 如來諸佛子。
- 23. 我以海潮音,讚佛功德海,願妙讚歌雲,飄臨彼等前。
- 24. 化身微塵數, 匐伏我頂禮 三世一切佛、正法最勝僧。
- 25. 禮敬佛靈塔 菩提心根本,亦禮戒勝者、方丈阿闍黎。
- 26. 乃至菩提藏,歸依諸佛陀,亦依正法寶、菩薩諸聖眾。
- 27. 我於十方佛 及具菩提心 大悲諸聖眾 合掌如是白:
- 28. 無始輪迴起,此世或他生,無知犯諸罪 或勸他作惡。

- 29. 或因癡所牽,隨喜彼作為,見此罪過已,佛前誠懺悔。
- 30. 惑催身語意,於親及三寶、師長或餘人,造作諸傷害。
- 31. 因昔犯眾過,今成有罪人;一切難恕罪,佛前悉懺悔。
- 32. 罪業未淨前,吾身或先亡;云何脫此罪?故祈速救護!
- 33. 死神不足信,不待罪淨否,無論病未病;壽暫不可恃。
- 34. 因吾不了知,死時捨一切,故為親與仇,造作諸罪業。
- 35. 仇敵化虛無, 諸親亦煙滅, 吾身必死亡, 一切終歸無。
- 36. 人生如夢幻;無論何事物,受已成念境,往事不復見。
- 37. 復次於此生,親仇半已逝;造罪苦果報,點滴候在前。
- 38. 因吾不甚解 命終如是驟,故起貪瞋癡,造作諸罪業。
- 39. 晝夜不暫留,此生續衰減,額外無復增,吾命豈不亡?
- 40. 臨終彌留際,眾親雖圍繞,命絕諸苦痛,唯吾一人受。
- 41. 魔使來執時,親朋有何益?唯福能救護,然我未曾修。
- 42. 放逸吾未知,死亡如是怖;故爲無常身,親造諸多罪。
- 43. 若今赴刑場 罪犯猶驚怖,口乾眼凸出,形貌異故昔;
- 44. 何況形恐怖 魔使所執持,大怖憂苦纏,苦極不待言。
- 45. 誰能善護我 離此大怖畏?睁大凸怖眼,四方尋救護。
- 46. 四方遍尋覓,無依心懊喪;彼處若無依,惶惶何所從?
- 47. 佛為眾怙主,慈悲勤護生,力能除眾懼,故我今歸依。
- 48. 如是亦歸依 能除輪迴怖 我佛所悟法,及諸菩薩眾。
- 49. 因怖驚顫慄,將身奉普賢;亦復以此身,敬獻文殊尊。
- 50. 哀號力呼求 不昧大悲行 慈尊觀世音:救贖罪人我!
- 51. 復於虛空藏,以及地藏王,一切大悲尊,由衷祈救護。
- 52. 歸依金剛持;懷瞋閻魔使,見彼心畏懼,四方速逃逸。
- 53. 昔違尊聖教,今生大憂懼;願以歸命尊,求速除怖畏!
- 54. 若懼尋常疾,尚須遵醫囑;何況貪等惑 宿疾恆纏身。
- 55. 一瞋若能致 赡部一切人,療惑諸藥方,遍尋若不得;
- 56. 醫王一切智,拔苦諸聖教,知己若不行,癡極應訶責!
- 57. 若遇尋常險,猶須慎防護;況墮千由旬 長劫險難處。

- 58. 或思今不死,安逸此非理;吾生終歸盡,死期必降臨。
- 59. 誰賜我無懼?云何定脱苦?倘若必死亡,爲何今安逸?
- 60. 除憶昔經歷,今我復何餘?然因執著彼,屢違師教誡。
- 61. 此生若須捨,親友亦如是,獨行無定所,何苦結親仇?
- 62. 不善生諸苦,云何得脱除?故我當一心,日夜思除苦。
- 63. 吾因無明癡,犯諸自性罪,或佛所制戒,及餘眾過罪。
- 64. 合掌怙主前,以畏罪苦心,再三禮諸佛,懺除一切罪。
- 65. 諸佛祈寬恕 往昔所造罪!此既非善行,爾後誓不爲!

### 第三品 受持菩提心

- 1. 欣樂而隨喜:一切眾有情 息苦諸善行、得樂諸福報。
- 2. 隨喜三學行一二乘菩提因;隨喜眾有情,實脫輪迴苦。
- 3. 隨喜佛菩提、佛子諸果地。亦復樂隨喜: 能與有情樂發心福善海,及諸饒益行。
- 4. 我於十方佛,合掌誠祈請:為苦癡迷眾,燃亮正法燈!
- 5. 知佛欲涅槃,合掌速祈請:住世無量劫,莫遺世間迷!
- 6. 如是諸觀行,所積一切善,以彼願消除,有情一切苦!
- 7. 乃至眾生疾,尚未療癒前,願爲醫與藥,並作看護士!
- 8. 盼天降食雨,解除飢渴難!放諸災荒劫,願成充飢食!
- 9. 為濟貧困者,願成無盡藏!願諸資生物,悉現彼等前!
- 10. 爲利有情故,不吝盡施捨 身財諸受用、三世一切善。
- 11. 捨盡則脱苦,吾心成涅槃;與其死方捨,何若生盡施?
- 12. 吾既將此身,隨順施有情,一任彼歡喜,恆常打罵殺!
- 13. 縱人戲我身,侵侮並譏諷,吾身既已施,云何復珍惜?
- 14. 一切無害業,令身力行之。願彼見我者,悉獲眾利益!
- 15. 若人因見我,生起信憎心,願彼恆成為,成辦眾利因!
- 16. 惟願毀我者、及餘害我者、乃至辱我者,皆長菩提緣!
- 17. 路人無怙依,願為彼引導,並作渡者舟、船筏與橋梁!
- 18. 求島即成島, 欲燈化為燈, 覓床變作床, 需僕成彼僕!

- 19. 願成如意牛、妙瓶如意寶、明咒及靈藥、如意諸寶樹!
- 20. 如空及四大,願我恆成為,無量眾有情,資生大根本!
- 21. 迨至盡空際 有情種種界 殊途悉涅槃,願成資生因!
- 22. 如昔諸善逝,先發菩提心,復次循序住 菩薩諸學處。
- 23. 如是爲利生,我發菩提心;復於諸學處,次第勤修學。
- 24. 智者如是持 清淨覺心已,復爲增長故,如是讚發心:
- 25. 今生吾獲福,幸得此人身。復生佛家族,喜成如來子。
- 26. 爾後我當爲 宜乎佛族業;慎莫染污此 無垢尊貴種。
- 27. 猶如目盲人,垃圾獲至實;生此菩提心,如是我何幸!
- 28. 滅死勝甘露,即此菩提心;除貧無盡藏,是此菩提心; 療疾最勝藥,亦此菩提心。
- 29. 彼爲泊世途 眾生休憩樹;復是出苦橋,迎眾離惡趣。
- 30. 彼是除惱熱 清涼心明月;復是璀璨日,能驅無知霾;
- 31. 是拌正法乳 所出妙醍醐。
- 32. 放諸漂泊客、欲享福樂者,此心能足彼,令住最勝樂。
- 33. 今於怙主前,筵眾爲上賓,宴饗成佛樂,普願皆歡喜。

### 第四品 不放逸

- 1. 佛子既如是,堅持菩提心,恆勤勿懈怠,莫違諸學處。
- 2. 遇事不慎思、率爾未經意,雖已誓成辦,後宜思捨否。
- 3. 諸佛及佛子,大慧所觀察,吾亦屢思擇,云何捨誓戒?
- 4. 若誓利眾生,而不勤踐履,則為欺有情;來生何所似!
- 5. 意若思布施 微少凡常物,因慳未施與,經說墮餓鬼。
- 6. 况請眾生赴 無上安樂宴,後反欺眾生,云何生善趣?
- 7. 有人捨覺心,卻辦解脫果。彼業不可思,知唯一切智。
- 8. 菩薩戒墮中,此罪最嚴重;因彼心若生,眾生利將損。
- 9. 雖僅一刹那 障礙他人德,因損有情利,惡趣報無邊。
- 10. 毀一有情樂,自身且遭損,況毀盡空際 有情眾安樂。
- 11. 故雜罪墮力、菩提心力者,昇沉輪迴故,登地久蹉跎。

- 12. 故如所立誓,我當恭敬行;今後若不勉,定當趨下流。
- 13. 饒益眾有情 無量佛已逝;然我因昔過,未得佛化育。
- 14. 若今依舊犯,如是將反覆 惡趣中領受,病縛剖割苦。
- 15. 若值佛出世、爲人信佛法、宜修善稀有 何日復得此?
- 16. 縱似今無病,足食無損傷,然壽刹那逝,身猶須臾質。
- 17. 憑吾此行素,人身難復得;若不得人身,徒惡乏善行。
- 18. 若具行善緣,而我未爲善,惡趣眾苦逼,屆時復何爲?
- 19. 既未行諸善,復集眾惡業,縱歷一億劫,不聞善趣名。
- 20. 是故世尊說:人身極難得;如海目盲龜,頸入軌木孔。
- 21. 刹那造重罪,歷劫住無間;何況無始罪 積重失善趣。
- 22. 然僅受彼報,苦猶不得脫;因受惡報時,復生餘多罪。
- 23. 既得此閒暇,我若不修善,自欺莫勝此,亦無過此愚。
- 24. 若我已解此,因癡復怠惰,則於臨終時,定生大憂苦。
- 25. 難忍地獄火,長久燒身時,悔火亦炙燃;吾心必痛苦。
- 26. 難得有益身,今既僥倖得,亦復具智慧,若仍墮地獄,
- 27. 則如咒所惑,令我心失迷;惑患無所知,何蠱藏心耶?
- 28. 貪瞋等諸敵,無手亦無足,非勇非精明,役我怎如奴?
- 29. 惑住我心中,任意傷害我,猶忍不瞋彼,非當應訶責。
- 30. 縱使天非天,齊來敵對我,然彼猶不能 擲我入無間。
- 31. 強力煩惱敵,擲我入獄火,須彌若遇之,灰燼亦無餘。
- 32. 吾心煩惱敵,長住無盡期;其餘世間敵,命不如是久。
- 33. 若我順侍敵,敵或利樂我;若隨諸煩惱 徒遭傷害苦。
- 34. 無始相續敵,孽禍唯一因;若久住我心 生死怎無懼?
- 35. 生死牢獄卒,地獄劊子手,若皆住我心,安樂何能有?
- 36. 乃至吾未能 親滅此惑敵 盡吾此一生,不應捨精進。 於他微小害 尚起瞋惱心 是故未滅彼,壯士不成眠。
- 37. 列陣激戰場 奮力欲滅除,終必自老死 生諸苦惱敵。 僅此尚不顧,箭矛著身苦,未達目的已 不向後逃逸。
- 38. 沉吾正精進,決志欲滅盡 恆為痛苦因 自然煩惱敵。

故今雖遭致 百般諸痛苦,然終不應當 喪志生懈怠。

39. 將士爲微利,赴戰遭敵傷;戰歸炫身傷,猶如配勳章。

吾今爲大利 修行勤精進,所生暫時苦,云何能困我?

40. 漁夫與屠户、農牧等凡俗,唯念己自身 求活維生計,

猶忍寒與熱、疲困諸艱辛;我今為眾樂,云何不稍忍?

- 41. 雖曾立此誓:欲於十力際,度眾出煩惱!然我未離惑。
- 42. 出言不量力,云何非顯狂?故於滅煩惱!應恆不退怯。
- 43. 吾應樂修斷,懷恨與彼戰;似瞋此道心,唯能滅煩惱。
- 44. 吾寧被燒殺,或遭斷頭苦;然心終不屈,順就煩惱敵。
- 45. 常敵受驅逐,仍可據他鄉,乃足旋復返:惑賊不如是。
- 46. 惑爲慧眼斷,逐已何所之?云何返害我?然我乏精進。 惑非住外境,非住根身間,亦非其他處 云何害眾生?
- 47. 惑幻心莫懼,爲智應精進。何苦於地獄 無義受傷害?
- 48. 思已當盡力,圓滿諸學處;若不遵醫囑,病患何能癒?

### 第五品 護正知

- 1. 欲護學處者,策勵當護心;若不護此心,不能護學處。
- 2. 若縱狂象心,受難無間獄;未馴大狂象,爲患不及此。
- 3. 若以正念索,緊栓心狂象,怖畏盡消除,福善悉獲至。
- 4. 虎獅大象熊、蛇及一切敵、有情地獄卒、惡神並羅刹。
- 5. 唯由繫此心,即攝彼一切;調伏此一心,一切皆馴服。
- 6. 實語者佛言:一切諸畏懼、無量眾苦痛,皆從心所生。
- 7. 有情獄兵器,施設何人意?誰製燒鐵地?妖女從何出?
- 8. 佛說彼一切 皆由惡心造。是故三界中,恐怖莫甚心。
- 9. 若除眾生貧,始圓施度者,今猶見飢貧,昔佛云何成?
- 10. 心樂與眾生,身財及果德,依此施度圓;故施唯依心。
- 11. 遣魚至何方,始得不遭傷?斷盡惡心時,說爲戒度圓。
- 12. 碩者如虛空, 豈能盡制彼?若息此瞋心, 則同滅眾敵。
- 13. 何需足量革, 盡覆此大地?片革墊靴底,即同覆大地。

- 14. 如是吾不克 盡制諸外敵;唯應伏此心,何勞制其餘?
- 15. 生一明定心,亦得梵天果。身口善縱勤,心弱難成就。
- 16. 雖久習唸誦,及餘眾苦行,然心散它處;佛說彼無益。
- 17. 若不知此心, 奥秘法中尊, 求樂或避苦, 無義終漂泊。
- 18. 故吾當善持、善護此道心;除此護心戒,何勞戒其餘?
- 19. 如處亂眾中,人皆慎護瘡;豈身惡人群,常護此心傷。
- 20. 若懼小瘡痛,猶慎護瘡傷;畏山夾毀者,何不護心傷?
- 21. 行持若如斯,縱住惡人群,抑處美人窩,勤律終不退。
- 22. 吾寧失利養、資身眾活計,亦寧失餘善,終不損此心。
- 23. 合掌誠勸請 欲護自心者:致力恆守護 正念與正知!
- 24. 身疾所困者,無力爲諸業;如是惑擾心,無力成善業。
- 25. 心無正知者,聞思修所得,如漏瓶中水,不復住正念。
- 26. 縱信復多聞,數數勤精進,然因無正知,終染犯墮垢。
- 27. 惑賊不正知,尾隨念失後,盜昔所聚福,令墮諸惡趣。
- 28. 此群煩惱賊,尋隙欲打劫;得便奪善財,復毀善趣命。
- 29. 故終不稍縱 正念離意門,離則思諸患,復住於正念。
- 30. 恆隨上師尊、畏墮聞法語,易令善信者,恆常生正念。
- 31. 佛及菩薩眾,無礙見一切;故吾諸言行,必現彼等前。
- 32. 如是思惟已,則生慚敬畏;循此復極易,慇慇隨念佛。
- 33. 爲護心意門,安住正念已,正知即隨臨,逝者亦復返。
- 34. 心意初生際,知其有過已,即時護正念,堅持住如樹。
- 35. 吾終不應當 無義散漫望;決志當恆常,垂眼微下望。
- 36. 蘇息吾眼故,偶宜顧四方。若見有人至,正視道善來。
- 37. 爲察道途險,四處頻觀望;憩時宜回顧,背面細檢索。
- 38. 前後視察已,續行或折返。故於一切時,應視所需行。
- 39. 欲身如是住,安妥威儀已,時時應細察:此身云何住?
- 40. 盡力遍觀察:此若狂象心 緊繫念法柱,已栓未失否?
- 41. 精進習定者,刹那勿弛散;念念恆伺察:吾意何所之?
- 42. 危難喜慶時,心散亦應安;經說行施時,可捨微細戒。

- 43. 思已欲爲時,莫更思他事;心志應專一,且先成辦彼。
- 44. 如是事皆成,否則俱不成。隨眠不正知,由是不增盛。
- 45. 無義眾閒談,諸多賞心劇,臨彼境界時,當斷意貪著。
- 46. 無義掘挖割,於地繪圖時,當憶如來教,懼罪捨彼行。
- 47. 若身欲移動,或口欲出言,應先觀自心,安隱如理行。
- 48. 吾意正生貪,或欲瞋恨時,言行應暫止,如樹安隱住。
- 49. 掉舉與藐視,傲慢或驕矜,或欲揭人短,或思偽與詐,
- 50. 或思勤自讚,或欲詆毀他,粗言興諍鬥,如樹應安住。
- 51. 或思名利敬,若欲差僕役,若欲人侍奉,如樹應安住。
- 52. 欲削棄他利,或欲圖己利,因是欲語時,如樹應安住。
- 53. 不耐懶與懼,無恥言無義,親友愛若生,如樹應安住。
- 54. 應觀此染污、好行無義心;知已當對治,堅持守此意。
- 55. 深信極肯定、堅穩恭有禮、知慚畏因果、寂靜勤予樂。
- 56. 愚稚意不合,心且莫生厭;彼乃惑所生,思已應懷慈。
- 57. 爲自及有情,利行不犯罪,更以幻化觀,恆常守此意。
- 58. 吾當再三思:歷劫得暇滿;故應持此心,不動如須彌。
- 59. 禿鷹貪食肉,爭奪扯我屍;若汝不經意,云何今愛惜?
- 60. 意汝於此身,何故執且護?汝彼既各别,於汝何所需?
- 61. 癡意汝云何 不護淨樹身?何苦勤守護 腐朽臭皮囊?
- 62. 首當以意觀,析出表皮層,次以智慧劍,剔肉離身骨。
- 63. 復解諸骨骼,審觀至於髓;當自如是究:何處見精妙?
- 64. 如是勤尋覓,若未見精妙,何故猶貪著、愛護此垢身?
- 65. 若垢不堪食,身血不宜飲,腸胃不適吮,身復何所需?
- 66. 貪身唯一因,為護狐鷲食;故應惜此身,獨爲修諸善!
- 67. 縱汝護如此,死神不留情,奪已施鷲狗,屆時復何如?
- 68. 若僕不堪使,主不與衣食;養身而它去,爲何善養護?
- 69. 既酬彼薪資,當令辦吾利;無益則於彼,一切不應與。
- 70. 念身如舟揖, 唯充去來依; 為辦有情利, 修成如意身。
- 71. 自主己身心,恆常露笑顏,平息怒紋眉,善成眾生友。

- 72. 移座勿隨意,至發大音聲,開門勿粗暴;溫文悦人心。
- 73. 水鷗貓盜賊,無聲行悄捷,故成所欲事;佛諭如是行。
- 74. 宜善勸勉人,恭敬且頂戴 不請饒益語,恆爲眾人徒。
- 75. 一切妙雋語,皆讚爲善說! 見人行福善,歡喜生讚歎。
- 76. 暗稱他人功,隨和他人德;聞人稱己德,應忖自有無。
- 77. 一切行為喜,此喜價難沽;故當依他德,安享隨喜樂。
- 78. 如是今無損,來世樂亦多;反之因嫉苦,後世苦更增。
- 79. 出言當稱意,義明語相關,悅意離貪瞋,柔和調適中。
- 80. 眼見有情時,誠慈而視之;念我依於彼 乃能成佛道。
- 81. 熱衷恆修善,或勤興對治。施恩悲福田,成就大福善。
- 82. 善巧具信已,即當常修善;眾善己應為,誰亦不仰仗。
- 83. 施等波羅蜜, 層層漸昇進; 因小勿失大, 大處思利他。
- 84. 前理既已明,應勤饒益他。慧遠具悲者,佛亦開諸遮。
- 85. 食當與墮者、無怙住戒者,己食唯適量;三衣餘盡施。
- 86. 修行正法身, 莫爲小故傷; 行此眾生願, 迅速得圓滿。
- 87. 悲願未清淨,不應施此身;今世或他生,利大乃可捨。
- 88. 無病而覆頭、纏頭或撐傘、手持刀兵杖,不敬勿說法。
- 89. 莫示無伴女,慧淺莫言深,於諸淺深法,等敬漸修習。
- 90. 於諸利根器,不應與淺法;不應捨律行,以咒誑惑人。
- 91. 牙木與唾涕,棄時應掩蔽;用水及淨地,不應棄屎溺。
- 92. 食時莫滿口、出聲與例嘴。坐時勿伸足,雙手莫揉搓。
- 93. 車床幽隱處, 莫會他人婦; 世間所不信, 隨俗避譏嫌。
- 94. 單指莫示意,心當懷恭敬,平伸右手掌;示路亦如是。
- 95. 肩臂莫揮擺,示意以微動、出聲及彈指;否則易失儀。
- 96. 睡如佛涅樂,應朝欲方臥;正知並決志:覺已速起身!
- 97. 菩薩諸行儀,經說無有盡。然當盡己力,修持淨心行。
- 98. 晝夜當各三,誦讀三聚經,依佛菩提心,悔除墮罪餘。
- 99. 爲自或爲他,何時修何行,佛說諸學處,皆當勤修習。
- 100. 佛子不需學,畢竟皆無有;善學若如是,福德焉不至?

- 101. 直接或間接,所行唯利他;但為有情利,迴向大菩提。
- 102. 捨命亦不離 善巧大乘義 安住淨律儀 珍貴善知識。
- 103. 應如吉祥生,修學侍師規。此及餘學處,閱經即能知。
- 104. 經中學處廣,故應閱經藏;首當先閱覽 尊聖虛空藏。
- 105. 亦當勤閱讀 學處眾集要;佛子恆修處,學集廣說故。
- 106. 或暫閱精簡 一切經集要。亦當偶披閱 龍樹二論典。
- 107. 經論所未遮,皆當勤修學。爲護世人心,知已即當行。
- 108. 再三宜深觀 身心諸情狀;僅此簡言之,即護正知義。
- 109. 法應躬謹行,徒說豈獲益;唯閱療病方,疾患云何癒?

## 第六品 安忍

- 1. 一瞋能摧毀 千劫所積聚 施供善逝等 一切諸福善。
- 2. 罪惡莫過瞋,難行莫勝忍;故應以眾理,努力修安忍。
- 3. 若心執灼瞋,意即不寂静,喜樂亦難生,煩躁不成眠。
- 4. 縱人以利敬,恩施來依者,施主若易瞋,反遭彼弑害。
- 5. 瞋令親友厭,雖施亦不依。若心有瞋恚,安樂不久住。
- 6. 瞋敵能招致 如上諸苦患。精勤滅瞋者,享樂今後世。
- 7. 強行我不欲,或撓吾所欲,得此不樂食,瞋盛毀自他。
- 8. 故應盡斷除 瞋敵諸糧食;此敵唯害我,更無他餘事。
- 9. 遭遇任何事,莫撓歡喜心;憂惱不濟事,反失諸善行。
- 10. 若事尚可爲,云何不歡喜,若已不濟事,憂惱有何益?
- 11. 不欲吾與友,歷苦遭輕蔑,聞受粗鄙語;於敵則反是。
- 12. 樂因何其微,苦因極繁多;無苦無出離,故心應堅忍。
- 13. 苦行伽那巴,無端忍燒割;吾今求解脱,何故反畏怯?
- 14. 久習不成易,此事定非有;漸習小害故,大難亦能忍。
- 15. 蛇及虻蚊噬、飢渴等苦受,乃至疥瘡等,豈非見慣耶?
- 16. 故於寒暑風、病縛捶打等,不宜太嬌弱;若嬌反增苦。
- 17. 有人見己血,反增其堅勇;有人見他血,驚慌復悶絕。
- 18. 此二大差别,悉由勇怯致;故應輕害苦,莫爲諸苦毀。

- 19. 智者縱歷苦,不亂心澄明;奮戰諸煩惱,雖生多害苦。
- 20. 然應輕彼苦,力克貪瞋敵。制惑眞勇士,餘唯弑屍者。
- 21. 苦害有諸德:厭離除驕慢,悲愍生死眾,蓋惡樂行善。
- 22. 不瞋膽病等 痛苦大淵藪,云何瞋有情?彼皆緣所成。
- 23. 如人不欲病,然病仍生起;如是不欲惱,煩惱強湧現。
- 24. 心雖不思瞋,而人自然瞋。如是未思生,瞋惱猶自生。
- 25. 所有眾過失,種種諸罪惡,彼皆緣所生,全然非自力。
- 26. 彼等眾緣聚,不思將生瞋;所生諸瞋惱,亦無已生想。
- 27. 縱許有主物,施設所謂失,主我不故思:將生而生起。
- 28. 不生故無果。常我欲享果,於境則恆散;彼執永不息。
- 29. 彼我若是常,無作如虛空;縱遇他緣時,不動無變異。
- 30. 作時亦如前,則作有何用?謂作用即此,我作何相干?
- 31. 是故一切法,依他非自主。知已不應瞋 如幻如化事。
- 32. 由誰除何瞋?除瞋不如理。瞋除諸苦滅,故非不應理。
- 33. 故見怨或親 非理妄加害,思此乃緣生,受之廿如飴。
- 34. 若苦由自取,而人皆厭苦,以是諸有情,皆當無苦楚。
- 35. 或因己不瞋,以刺自戮傷;或爲得婦心,憂傷復絕食;
- 36. 縱崖或自縊,吞服毒害食;妄以自虐行,於已作損傷。
- 37. 自惜性命者,因惑尚自盡;況於他人身,絲毫不傷損。
- 38. 故於害我者,心應懷慈愍;慈悲縱不起,生瞋亦非當。
- 39. 設若害他人 乃愚自本性, 瞋彼則非理; 如瞋燒性火。
- 40. 若過是偶發,有情性仁賢,則瞋亦非理;如瞋煙蔽空。
- 41. 棍杖所傷人,不應瞋使者;杖復瞋使故,理應憎其瞋。
- 42. 我昔於有情,曾作如是害;既曾傷有情,理應受此損。
- 43. 敵器與我身,二皆致苦因;雙出器與身,於誰該當瞋?
- 44. 身似人形瘡,輕觸苦不堪;盲目我愛執,遭損誰當瞋?
- 45. 愚夫不欲苦,偏作諸苦因;既由己過害,豈能憎於人?
- 46. 譬如地獄卒,乃諸劍葉林,既由己業生,於誰該當瞋?
- 47. 宿業所引發,令他損惱我,因此若墮獄,豈非我害他?

- 48. 依敵修忍辱,消我諸多罪;怨敵因我忍,墮獄久受苦。
- 49. 若我令受害,敵反饒益我,則汝粗暴心,何故反瞋彼?
- 50. 若我有功德,必不墮地獄。若吾自守護,則彼何所得?
- 51. 若以怨報怨,則敵不護罪;吾行將退失,難行亦毀損。
- 52. 心意無形體,誰亦不能毀;若心執此身,定遭諸苦損。
- 53. 輕蔑語粗鄙,口出惡言辭,於身既無害;心汝何故瞋?
- 54. 謂他不喜我;然彼於現後,不能毀損我,何故厭譏毀?
- 55. 謂礙利養故;縱我厭受損,吾利終須捨,諸罪則久留。
- 56. 寧今速死殁,不願邪命活; 苔安縱久住,終必遭死苦。
- 57. 夢受百年樂,彼人復甦醒;或受須臾樂,夢已此人覺;
- 58. 覺已此二人,夢樂皆不還。壽雖有長短,臨終唯如是!
- 59. 設得多利養,長時享安樂,死如遭盜劫,赤裸空手還。
- 60. 謂利能活命,淨罪並修福;然為利養瞋,福盡惡當生。
- 61. 若為塵俗活,復因彼退墮,唯行罪惡事,苟活義安在?
- 62. 謂謗令他疑,故我瞋謗者;如是何不瞋 誹謗他人者?
- 63. 謂此唯關他,是故吾堪忍;如是何不忍 煩惱所生謗?
- 64. 於佛塔像法,誹詆損毀者,吾亦不應瞋;因佛遠諸害。
- 65. 於害上師尊,及傷親友者,思彼皆緣生,知已應止瞋。
- 66. 情與無情二,俱害諸有情,云何唯瞋人?故我應忍害。
- 67. 或由愚損人,或因痴還瞋;此中孰無過?孰爲有過者?
- 68. 因何昔造業,於今受他害?一切既依業,憑何瞋於彼?
- 69. 如是體解已,以慈互善待。故吾當一心,勤行諸福善。
- 70. 譬如屋著火,燃及他屋時,理當速移棄 助火蔓延草。
- 71. 如是心所貪,能助瞋火蔓,慮火燒德屋,應疾厭棄彼。
- 72. 如彼待殺者,斷手獲解脱;若以修行苦,離獄豈非善?
- 73. 於今些微苦,若我不能忍,何不除瞋恚一地獄罪苦因?
- 74. 爲欲曾千返 墮獄受燒烤;然於自他利,今猶未成辦。
- 75. 安忍苦不劇,復能成大利;為除眾生害,欣然受此苦。
- 76. 人讚敵有德,若獲歡善樂;意汝何不讚,令汝自歡喜?

- 77. 如是所生樂,唯樂無性罪,諸佛皆稱許;復是攝他法。
- 78. 謂他獲樂故,然汝厭彼樂;則應不予酬;此壞現後樂?
- 79. 他讚吾德時,吾亦欲他樂;他讚敵功德,何故我不樂?
- 80. 初欲有情樂,而發菩提心;有情今獲利,何故反瞋彼?
- 81. 初欲令有情,成佛受他供;今見人獲利,何故生嫉惱?
- 82. 所因恩養親,當由汝供給;他親既養護,不喜豈反瞋?
- 83. 不願人獲利, 豈願彼證覺? 妒憎富貴者, 寧有菩提心?
- 84. 若已從他得,或利在施家,二俱非汝有,施否何相干?
- 85. 何故棄福善、信心與己德?不守已得財,何不自瞋責?
- 86. 於昔所爲惡,猶無憂愧色,豈還欲競勝 曾培福德者?
- 87. 縱令敵不喜,汝有何可樂?唯盼敵受苦,不成損他因。
- 88. 汝願縱得償,他苦汝何樂?若謂滿我願,招禍豈過此?
- 89. 若爲瞋漁夫,利鉤所鉤執,陷我入地獄,定受獄卒煎。
- 90. 受讚享榮耀,非福非增壽,非力非免疫,非令身安樂。
- 91. 若吾識損益,讚譽有何利?若唯圖稱心,應依飾與酒。
- 92. 若僅為虛名,失財復喪命,譽詞何所為?死時誰得樂?
- 93. 沙屋傾頹時,愚童哀極泣;若我傷失譽,豈非似愚童?
- 94. 聲暫無心故,稱譽何足樂?若謂他喜我,彼讚是喜因;
- 95. 受讚或他喜,於我有何益?喜樂屬於彼,少分吾不得。
- 96. 他樂故我樂;於眾應如是。他喜而讚敵,何故我不樂?
- 97. 故我受讚時,心若生歡喜,此喜亦非當,唯是愚童行。
- 98. 讚譽令心散,損壞厭離心,令妒有德者,復毀圓滿事。
- 99. 以是若有人,欲損吾聲譽,豈非救護我,免墮諸惡趣。
- 100. 吾唯求解脱,無須利敬縛;於解束縛者,何故反生瞋?
- 101. 如我欲趣苦,然蒙佛加被,閉門不放行,云何反瞋彼?
- 102. 謂敵能障福;瞋敵亦非當。難行莫勝忍,云何不忍耶?
- 103. 若我因己過,不堪忍敵害,豈非徒自障 習忍福德因?
- 104. 無害忍不生,怨敵生忍福。既爲修福因,云何謂障福?
- 105. 應時來乞者,非行布施障;授戒諸方丈,亦非障出家。

- 106. 世間乞者眾,忍緣敵害稀。若不外施怨,必無爲害者。
- 107. 故敵極難得,如寶現貧舍;能助菩提行,故當喜自敵。
- 108. 敵我共成忍,故此安忍果,首當奉獻彼;因敵是忍緣。
- 109. 謂無助忍相,故敵非應供;則亦不應供 正法修善因。
- 110. 謂敵思爲害,故彼非應供;若如醫利我,云何修安忍;
- 111. 既依極瞋心,乃堪修堅忍?教敵是忍因,應供如正法。
- 112. 本師牟尼說:生佛勝福田。常敬生佛者,圓滿達彼岸。
- 113. 成佛所依緣,有情等諸佛。敬佛不敬眾,豈有此言教?
- 114. 非說智德等,由用故云等;有情助成佛,故說生佛等。
- 115. 應供慈心者,因彼珍貴故;敬佛福德廣,亦因佛尊貴。
- 116. 助修成佛故,應許生佛等。然生非等佛 無邊功德海。
- 117. 唯佛功德齊;於具少分者,雖供三界物,猶嫌不得足。
- 118. 有情具功德:能生勝佛法;唯因此德符,即應供有情。
- 119. 無偽眾生親---諸佛唯利生。除令有情喜,何足報佛恩?
- 120. 利生方足報 捨身入獄佛,故我雖受害,亦當行眾善。
- 121. 諸佛爲有情,尚且惜自身,愚癡驕慢我,何不侍眾生?
- 122. 眾樂佛歡喜,眾苦佛傷悲;悦眾佛愉悦,犯眾亦傷佛。
- 123. 遍身著火者,與欲樂不生;若傷諸有情,云何悦諸佛?
- 124. 因昔害眾生,令佛傷心懷;眾罪我今悔,祈佛盡寬恕!
- 125. 爲令如來喜,止害利世間;任他踐吾頂,寧死悅世主。
- 126. 大悲諸佛尊, 視眾猶如己; 生佛既同體, 何不敬眾生?
- 127. 悦眾令佛喜,能成自利益,能除世間苦,故應常安忍。
- 128. 譬如大王臣,雖傷眾多人,謀深慮遠者,力堪不報復。
- 129. 因敵力非單,王勢即彼援。故敵力雖弱,不應輕忽彼。
- 130. 悲佛與獄卒,吾敵眾依怙,故如民侍君,普令有情喜。
- 131. 暴君縱生瞋,不能令墮獄;然犯諸有情,定遭地獄害。
- 132. 如是王雖喜,不能令成佛;然悦諸眾生,終成無上覺。
- 133. 云何猶不見 取悦有情果:來生成正覺,今世享榮耀。
- 134. 生生修忍得:貌美無病障、譽雅命久長、樂等轉輪王。

#### 第七品 精進

- 1. 忍已需精進 精進證菩提;無風燈不動,無勤福不生。
- 2. 進即勇於善。下說其違品:懈怠耽劣事、自輕而退怯。
- 3. 貪圖懶樂味、習臥嗜睡眠、不厭輪迴苦,頻生強懈怠。
- 4. 云何猶不知:身陷惑網者,必入生死獄,終至死神口?
- 5. 有生必有死,汝豈不見乎?然樂睡眠者,如牛見屠夫。
- 6. 通道遍封已,死神正凝望;此時汝何能 貪食復耽眠?
- 7. 死亡速臨故,及時應積資,屆時方斷懶,遲矣有何用!
- 8. 未肇或始做,或唯半成時,死神突然至;嗚呼吾命休!
- 9. 因憂眼紅腫,面頰淚雙垂,親友已絕望;吾見閻魔使。
- 10. 憶罪懷憂苦,聞聲懼墮獄,狂亂穢覆身;屆時復何如?
- 11. 死時所懷懼,猶如待宰魚,何況昔罪引 難忍地獄苦。
- 12. 如嬰觸沸水,灼傷極刺痛;已造獄業者,云何復逍遙?
- 13. 不勤而冀得、驕弱頻怨苦、必死猶似仙,定受眾苦煎!
- 14. 依此人身筏,能渡大苦海。此筏難復得,愚者勿貪眠!
- 15. 棄捨勝法喜一無邊歡樂因,何故汝反喜 散掉等苦因?
- 16. 勿怯積資糧,習定令自主,自他平等觀,勤修自他換!
- 17. 不應自退怯,謂我不能覺。如來實語者,說此真實言:
- 18. 所有蚊虻蜂、如是諸蟲蛆,若發精進力,咸證無上覺。
- 19. 况我生為人,明辨利與害,行持若不廢,何故不證覺?
- 20. 若言我佈畏 須捨手足等;是昧輕與重,愚者徒自畏。
- 21. 無量俱祇劫,千番受割截、刺燒復分解,今猶未證覺。
- 22. 吾今修菩提,此苦有限期,如爲除腹疾,暫受療割苦。
- 23. 醫皆以小苦,療治令病除;爲滅眾苦故,當忍修行苦。
- 24. 凡常此療法,醫王不輕用;巧施緩妙方,療治眾痾疾。
- 25. 佛初先亦行 菜蔬等布施;習此微施已,漸能施已肉。
- 26. 一旦覺自身 卑微如菜蔬,爾時捨身肉,於彼有何難?
- 27. 身心受苦害, 邪見罪爲因。惡斷則無苦, 智巧故無憂。
- 28. 福德引身適,智巧令心安;爲眾處生死,菩薩啓疲厭?

- 29. 以此菩提心,能盡宿惡業,能聚福德海;故勝諸聲聞。
- 30. 故應除疲厭, 馭駕覺心駒,從樂趨勝樂;智者寧退怯?
- 31. 為辦有情利,四緣助精勤:信樂心堅毅、放捨心歡喜。 畏苦思利益,能生信樂力。
- 32. 爲除惰障故,巧施四助力,以慢喜捨欲,勤奮增精進。
- 33. 發願欲淨除 自他諸過失!然盡一一過,須修一劫海。
- 34. 若我未曾有 除過精進分,定受無量苦;吾心啓無懼?
- 35. 發願欲促成 自他眾功德!成此一一德;須修一劫海。
- 36. 然我終未生 應修功德分;無義耗此生,莫名太希奇!
- 37. 吾昔未供佛,未施喜宴樂,未曾依教行,未滿貧者願;
- 38. 未除佈者懼,未與苦者樂;故唯得胎苦,及老病死苦。
- 39. 從昔至於今,於法未信樂,故遭此困乏;誰復捨信樂?
- 40. 佛説一切善 根本爲信樂。信樂本則爲:恆思業因果。
- 41. 痛苦不悦意、種種諸畏懼、所求不順遂,皆從昔罪生。
- 42. 由行所思善,無論至何處,福報皆現前,供以善果德。
- 43. 惡徒雖求樂,然至一切處,罪報皆現前,劇苦猛摧殘。
- 44. 因昔淨善業,生居大蓮藏,芬芳極清涼;聞食妙佛語, 心潤光澤生;光照白蓮啓,托出妙色身,喜成佛前子。
- 45. 因昔眾惡業,閻魔諸獄卒,剝皮令受苦;熱火熔鋼液, 淋灌無膚體;炙燃劍矛刺,身肉盡碎裂,紛墮燒鐵地。
- 46. 故心應信樂、恭敬修善法。軌以金剛幢,行善修自信。
- 47. 首當量己力,自忖應爲否?不宜暫莫爲,爲已勿稍退。
- 48. 退則於來生、串習增罪苦;他業及彼果,卑劣復不成。
- 49. 於善斷惑力,應生自信心。吾應獨自為,此是志業慢。
- 50. 世人隨惑轉,不能辦自利。眾生不如我,故我當盡力。
- 51. 他尚勤俗務,我怎悠閒住?亦莫因慢修,無慢最爲宜。
- 52. 鳥鴉遇弱蛇,行勇如大鵬;信心若怯懦,反遭小過損。
- 53. 怯懦捨精進,啓能除福貧?自信復力行,障大亦無礙。
- 54. 故心應堅定,奮滅諸罪墮;我若負罪墮,何能超三界?

- 55. 吾當勝一切,不使惑勝我。吾乃佛獅子,應持此自信。
- 56. 屈就我慢者,非具自信心。勇者不屈撓,慢者制於慢。
- 57. 因慢生傲者,將赴惡趣道。人間歡宴失,爲僕食人殘;
- 58. 蠢醜體虛弱,輕蔑處處逢。傲慢自負者,豈入自信數? 堪憐寧過此?
- 59. 為勝我慢敵,堅持自信心;此乃勝利者、英豪自信士。 若復真實滅 暗延我慢敵,定能成佛果,圓滿眾生願。
- 60. 設處眾煩惱,千般須忍耐,如獅處狐群,不遭煩惱害。
- 61. 人逢大危難,先護其眼目;如是雖臨危,護心不隨惑。
- 62. 吾寧被燒殺,甚或斷頭顱,然終不稍讓,屈就煩惱敵; 一切時與處,不行無義事。
- 63. 如童逐戲樂;所爲眾善業,心應極耽著,樂彼無餍足。
- 64. 世人勤求樂,成否猶未定;二利能得樂,不行樂何有?
- 65. 如童嗜刃蜜,貪欲無饜足;感樂寂滅果,求彼何需足?
- 66. 爲成所求善,歡喜而趣行;猶如日中象,遇池疾奔入。
- 67. 身心俱疲時,暫捨爲久繼。事成應盡捨,續行餘善故。
- 68. 沙場老兵將,遇敵避鋒向;如是迴惑刃,巧縛煩惱敵。
- 69. 戰陣失利劍,懼殺疾捨取;如是若失念,畏獄速提起。
- 70. 循血急流動,箭毒速遍身;如是惑得便,罪惡盡覆心。
- 71. 如人劍逼身,行持滿缽油,懼溢慮遭殺;護戒當如是。
- 72. 復如蛇入懷,疾起速抖落;如是眠懈至,警醒速消除。
- 73. 每逢誤犯過,皆當深自責,屢思吾今後 終不犯此過。
- 74. 故於一切時,精勤修正念;依此求明師,圓成正道業。
- 75. 爲令堪眾善,應於行事前,憶敎不放逸,振奮歡喜行。
- 76. 如絮極輕盈,隨風任來去;身心若振奮,眾善皆易成。

### 第八品靜慮

- 1. 發起精進已,意當住禪定;心意渙散者,危陷惑牙間。
- 2. 身心若遠離,散亂即不生;故應捨世間,盡棄諸俗慮。

- 3. 貪親愛利等,則難捨世間;故當盡棄彼,隨智修觀行。
- 4. 有止諸勝觀,能滅諸煩惱;知已先求止,止由離貪成。
- 5. 自身本無常,猶貪無常人;縱歷百千生,不見所愛人。
- 6. 未遇則不喜,不能入等至;縱見不知足,如昔因愛苦。
- 7. 若貪諸有情,則障實性慧;亦毀厭離心,終遭愁嘆苦。
- 8. 若心專念彼,此生將虛度;無常眾親友,亦壞真常法。
- 9. 行為同凡愚,必墮三惡趣;心欲赴聖境,何需近凡愚?
- 10. 刹那成密友,須臾復結仇;喜處亦生瞋,凡夫取悦難!
- 11. 忠告則生瞋,反勸離諸善;若不從彼語,瞋怒墮惡趣。
- 12. 妒高競相等,傲卑讚復驕;逆耳更生瞋,處俗怎得益?
- 13. 伴愚必然生,自讚毀他過,好談世間樂,無義不善事。
- 14. 是故近親友,徒然自招損。彼既無益我,吾亦未利彼。
- 15. 故應遠凡愚,會時喜相迎,亦莫太親密,善繫君子誼。
- 16. 猶如蜂採蜜;爲法化緣已,如昔未謀面,淡然而處之。
- 17. 吾富受恭敬, 眾人皆喜我。若持此驕慢, 歿後定生懼。
- 18. 故汝愚癡意,無論貪何物,定惑苦果報,千倍所貪得。
- 19. 故智不應貪,貪生三途怖。應當堅信解:法性本應捨。
- 20. 縱吾財物豐,令譽遍稱揚,所集諸名利,非隨心所欲。
- 21. 若有人毀我,讚譽何足喜?若有人讚我,譏毀何足憂?
- 22. 有情種種心,諸佛難盡悦,何況劣如我?故應捨此慮。
- 23. 睥睨窮行者, 詆毀富修士; 性本難爲侶, 處彼怎得樂?
- 24. 如來曾宣示:凡愚若無利,鬱鬱終寡歡,故莫友凡愚。
- 25. 林中鳥獸樹,不出刺耳音,伴彼心常樂,何時共安居?
- 26. 何時住樹下、岩洞無人寺?願心不眷顧,斷捨塵世貪!
- 27. 何時方移棲,天然遼闊地,不執為我所,無貪恣意行?
- 28. 何時居無懼,唯持缽等器、匪盜不需衣,乃至不蔽體?
- 29. 何時赴寒林,觸景生此情:他骨及吾體,悉皆壞滅法。
- 30. 吾身速腐朽,彼臭令狐狼,不敢趨前嚐;其變終至此!
- 31. 孑然此一身,生時骨肉連,死後各分散,更況是他親?

- 32. 生既孤獨生, 殁復獨自亡, 苦痛無人攤, 親眷有何益?
- 33. 如諸行路客,不執暫留舍;如是行有道,豈應戀生家?
- 34. 不待眾親友,傷痛且哀泣,四人掮吾體,及時赴寒林。
- 35. 無親亦無怨,隻身隱山林;先若視同死,歿已無人憂。
- 36. 四周既無人 哀傷或爲害,故修隨念佛,無人擾令散。
- 37. 故當獨自棲 事少易安樂、靈秀宜人林,止息眾散亂。
- 38. 盡棄俗慮已,吾心當專一;爲令入等至 制惑而精進。
- 39. 現世及來生,諸欲引災禍;今生砍殺縛,來世入地獄。
- 40. 月老媒婆前,何故屢懇求?爲何全不忌 諸罪或惡名?
- 41. 縱險吾亦投,資財願耗盡;只爲女入懷,銷魂獲至樂。
- 42. 除骨更無餘;與其苦貪執,非我自主軀,何如趣涅槃?
- 43. 始則奮抬頭,親近羞垂視,葬前見未見,悉已紗覆面。
- 44. 昔隱惑君容,今現明眼前,鷲已去其紗,既見何故逃?
- 45. 昔時他眼窺,汝即忙守護;今鷲食彼肉,吝汝何不護?
- 46. 既見此聚屍, 鷲獸競分食, 何苦以花飾, 殷獻鳥獸食?
- 47. 若汝見白骨,靜臥猶驚怖,何不懼少女,靈動如活屍?
- 48. 昔衣汝亦貪,今裸何不欲?若謂厭不淨,何故擁著衣?
- 49. 糞便與口涎,悉從飲食生,何故貪口液,不樂臭糞便?
- 50. 嗜欲者不貪 柔軟木棉枕,謂無女體臭。彼誠迷穢垢。
- 51. 迷劣欲者言:棉枕雖滑柔,難成鴛鴦眠;於彼反生瞋。
- 52. 若謂厭不淨; 肌腱繫骨架, 肉泥粉飾女, 何以擁入懷?
- 53. 汝自多不淨,日用恆經歷,豈貪不得足,猶圖他垢囊?
- 54. 若謂喜彼肉,欲觀並摸觸;則汝何不欲,無心屍肉軀?
- 55. 所欲婦女心,無從觀與觸,可觸非心識,空擁何所爲?
- 56. 不明他不淨,猶非稀奇事;不知自不淨,此則太稀奇!
- 57. 汝執不淨心,何故捨晨曦,初啓嫩蓮華,反著垢穢囊?
- 58. 若汝不欲觸 垢穢所塗地,云何反欲撫 洩垢體私處?
- 59. 若謂厭不淨;垢種所孕育,穢處所出生,何以摟入懷?
- 60. 糞便所生蛆,雖小尚不欲,云何汝反欲 垢生不淨軀?

- 61. 汝於不淨身,非僅不輕棄,反因貪不淨,圖彼臭皮囊。
- 62. 宜人冰片等,米飯或菜蔬,食已復排出,大地亦染污。
- 63. 垢身濁如此,親見若復疑,應觀寒屍林,腐屍不淨景。
- 64. 皮表迸裂屍,見者生大畏;知己復何能 好色生歡喜?
- 65. 塗身微妙香,栴檀非她身;何以因異香,貪著她身軀?
- 66. 身味若本臭,不貪豈非善?貪俗無聊輩,爲何身塗香?
- 67. 若香屬栴檀,身出何異味?何以因異香,貪愛女身軀?
- 68. 長髮污修爪,黄牙泥臭味,皆令人怖畏,軀體自本性。
- 69. 欲如傷己器,何故令鋒利?自迷癡狂徒,嗚呼滿天下!
- 70. 寒林唯見骨,意若生厭離,豈樂活白骨 充塞寒林城?
- 71. 復次女垢身,無酬不可得;今生逐塵勞,後世遭獄難。
- 72. 少無生財力,及長怎享樂?財積壽漸近,衰老欲何爲?
- 73. 多欲卑下人,白日勞務疲,夜歸氣力盡,身如死屍眠。
- 74. 或需赴他鄉,長途歷辛勞,雖欲會嬌妻,終年不相見。
- 75. 或人爲謀利,因愚賣身訖;然利猶未得,空隨業風去。
- 76. 或人自售身,任隨他指使;妻妾縱臨產,荒郊樹下生。
- 77. 欲欺凡夫謂:求活謀生故;慮喪赴疆場,爲利成傭奴。
- 78. 爲欲或喪身,或豎利戈尖,或遭短矛刺,乃至火焚燒。
- 79. 歷盡聚守苦,方知財多禍;貪金渙散人,脱苦遙無期。
- 80. 貪欲生眾苦,害多福利少;如彼拖車牲,唯得數口草。
- 81. 彼利極微薄,雖畜不難得;爲彼勤苦眾,竟毀暇滿身。
- 82. 諸欲終壞滅,貪彼易墮獄;爲此瞬息樂,須久歷艱困。
- 83. 彼困千萬分,便足成佛道。欲者較菩薩,苦多無菩提。
- 84. 思維地獄苦,始知諸欲患,非毒兵器火、險敵所能擬。
- 85. 故當厭諸欲,欣樂阿蘭若。離諍無煩惱,寂靜山林中。
- 86. 皎潔明月光,清涼似檀香,傾洩平石上,如宮意生歡。 林風無聲息,徐徐默吹送,有福瑜伽士,踱步思利他。
- 87. 空舍岩洞樹, 隨時任意住; 盡捨護持苦, 無忌恣意行。
- 88. 離貪自在行,誰亦不相干;王侯亦難享,知足閒居歡。

- 89. 遠離諸塵緣,思彼具功德,盡息諸分别,觀修菩提心。
- 90. 首當勤觀修 自他本平等;避苦求樂同,護他如護己。
- 91. 手足肢雖眾,護如身則同;眾生苦樂殊,求樂與我同。
- 92. 雖吾所受苦,不傷他人身,此苦亦當除,執我難忍故。
- 93. 如是他諸苦,雖不臨吾身,彼苦仍應除,執我難忍故。
- 94. 我應除他苦,他苦如自苦;我當利樂他,有情如吾身。
- 95. 自與他雙方,求樂既相同,自他何差殊?何故求獨樂?
- 96. 自與他雙方,惡苦既相同,自他何差殊?何故唯自護?
- 97. 謂彼不傷吾,故不護他苦;後苦不害今,何故汝防護?
- 98. 若謂當受苦;此誠邪思惟!亡者他體故,生者亦復然。
- 99. 若謂自身苦 應由自防護;足苦非手苦,何苦手護足?
- 100.若謂此非理,執我故如此;執自他非理,唯當極力斷。
- 101.心續與身聚,假名如軍鬘;本無受苦者,誰復除彼苦?
- 102.既無受苦者,諸苦無差别。是苦即當除,何需強區分?
- 103.不應有此諍:何需除他苦?欲除悉應除,否則自他如。
- 104. 悲心引眾苦,何故強催生?若愍眾生苦,自苦云何增?
- 105.一苦若能除 眾多他人苦,爲利自他故,慈者樂彼苦。
- 106.妙花月雖知 國王有害意,然爲盡眾苦,不惜殉自命。
- 107.如是修自心,則樂滅他苦;惡獄亦樂往,如鵝趣蓮池。
- 108.有情若解脱,心喜如大海;此喜寧不足?云何唯自度?
- 109.故雖謀他利,然無驕矜氣;一心樂利他,不望得善報。
- 110.微如言不遜,吾亦慎防護;如是於他苦,當習悲護心。
- 111.如親精卵聚,本非吾自身,串昔故執取 受精卵爲我。
- 112.如是於他身,何不執為我?自身換他身,是故亦無難。
- 113.自身過患多,他身功德廣。知己當修習 愛他棄我執。
- 114. 眾人皆認許: 手足是身肢。如是何不許: 有情眾生分?
- 115.於此無我軀,串習成我所;如是於他身,何不生我覺?
- 116.故雖謀他利,然無驕矜氣;如人自餵食,未曾盼回報。
- 117.微如言不遜,吾亦慎迴護;如是於眾生,當習悲護心。

```
118.怙主觀世音,爲除眾怖畏,湧現大悲心,加持自聖號。
119.聞名昔喪膽,因久習近故,失彼竟寡歡;知難應莫退。
120.若人欲速疾 救護自與他,當修自他換 勝妙秘密訣。
121. 貪著自身故,小怖亦生畏。於此生懼身,誰不似敵瞋?
122.千般欲療除 飢渴身疾者,補殺魚鳥獸,伺機劫道途。
123.或爲求利敬,乃至殺父母,盗取三寶物,以是焚無間。
124.有誰聰智者,欲護供此身?誰不視如仇?誰不輕蔑彼?
125.若施何能享?自利餓鬼道。自享何所施?利他人天法。
126.為自而害他,將受地獄苦。損己以利人,一切圓滿成。
127.欲求自高者,卑愚墮惡趣。迴此舉薦他,受敬上善道。
128. 為己役他者,終遭僕役苦。勞自以利他,當封王侯爵。
129.所有世間樂,悉從利他生。一切世間苦,咸由自利成。
130.何需更繁敘?凡愚求自利,牟尼唯利他;且觀此二别!
131.若不以自樂,真實換他苦,非僅不成佛,生死亦無樂。
132.後世且莫論;今生不爲僕,顧主不予酬,難成現世利。
133.利他能成樂,否則樂盡失;害他令受苦,愚者定遭殃。
134.世間諸災害、怖畏及眾苦,悉由我執生,留彼何所爲?
135.我執未盡捨,苦必不能除;如火未拋棄,不免受灼傷。
136.故爲止自害,及滅他痛苦,捨自盡拖他,愛他如愛己。
137. 意汝定當知:吾已全屬他。除利有情想,切莫更思餘。
138.不應以他眼,成辦自利益,亦莫以眼等,邪惡待眾生。
139.故當尊有情;已身所有物,見以咸取出,廣利諸眾生。
140.易位卑等高,移自換為他,以無疑慮心,修妒競勝慢。
141.蒙敬彼非我,吾財不如彼,受讚他非我,彼樂吾受苦。
142.工作吾勤苦,度日彼安逸;世間盛讚彼,身敗吾名裂。
143.無才何所為?才學眾稀有;彼較某人劣,吾亦勝某人。
144.戒見衰退等,因惑而非我;故應悲濟我,困則自取受。
145.然吾未蒙濟,竟然反遭輕;彼雖具功德,於我有何益?
146.不愍愚眾生,危陷惡趣口,向外誇已德,欲勝諸智者。
```

```
147. 為令自優勝 利能等我者,縱諍亦冀得 財利與恭敬。
148.極力稱吾德,令名揚世間;克抑彼功德,不令世人聞。
149.復當隱吾過,受供而非他,令我獲大利,受敬而非他。
        淪落久遭難,令受眾嘲諷,競相共責難。
150.吾喜觀望彼
151.據云此狂徒 欲與吾相爭;彼才貌慧識、種性寧等我?
152.故令聞眾口 齊頌吾勝德,毛豎心歡喜,渾然樂陶陶。
153.彼富吾奪取;若爲吾從僕,唯予資生酬,其餘悉霸取。
154.令彼乏安樂,恆常遇禍害。我執於生死,百般折損我。
155.汝雖欲自利,然經無數劫,遍歷大劬勞,執我唯增苦。
156.是故當盡心,勤行眾生利;牟尼無欺言,奉行必獲益。
157.若汝自往昔,素行利生事,除獲正覺樂,必不逢今苦。
158.故汝於父母,一滴精血聚,既可執為我,於他亦當習。
159.應爲它密探;見己有何物,悉數盡盜取,以彼利眾生。
160.我樂他不樂,我高他卑下,利己不顧人,何不反自妒?
161.吾當雖安樂,甘代他人苦;時觀念起處,細察己過失。
162.他雖犯大過,欣然吾頂替;自過縱微小,眾前誠懺悔。
163.顯揚他令譽,以此匿己名;役自如下僕,勤謀眾人利。
164.此身過本多,德寡奚足誇?故當隱己德,莫令他人知。
165.往昔爲自利,所行盡害他;今爲他謀利,願害悉歸我!
166.莫令汝此身,猛現頑強相,令如初嫁媳,羞畏極謹慎。
167.堅持利他行,切莫傷眾生;妄動應制止,踰矩當治罰。
168.縱已如是誨,汝猶不行善,眾過終歸汝,屆時唯受罰。
169.昔時受汝制,今日吾已覺;無論至何處,悉催汝驕慢。
170.今當棄此念:尚享自權益。汝已售他人,莫哀應盡力!
171.若吾稍放逸,爲施汝於眾,則汝定將我,販與諸獄卒。
172.如是汝屢屢,棄我令久苦;今憶宿仇怨,摧汝自利性!
173.若汝欲自惜,不應自愛執;若汝欲自護,則當常護他。
174.汝愈獻慇懃,護此不淨身,彼愈趨退墮,衰朽極脆弱。
175.身弱欲愛增,大地一切物,尚且不餍足;誰復愜彼欲?
```

176.逐欲爲得足,生惱復失意;若人無所求,彼福無窮盡。 177.樂長身貪故,莫令有機趁;不執悦意物,厥爲真妙財。 178.可怖不淨身,不動待他牽,火化終成灰;何故執爲我? 179.無論生與死,朽身何所爲?豈異木石等?怎不除我慢? 180.奉承此身故,無義集諸苦;於此似樹身,何勞貪與瞋? 181.細心極愛護,或棄驚獸食,身既無貪瞋,何苦愛此身? 182.何毀引身瞋?何讚令身喜?身既無所知,殷懃何所爲? 183.若人喜我身,則彼爲吾友;眾皆愛己身,何不愛眾生? 184.故應離貪執,爲眾捨己身;此身雖多患,善用如實筏。 185.愚行足堪厭,今當隨聖賢;憶敎不放逸,奮退昏與眠 186.如佛大悲子,安忍所當行;若不恆勤修,何日得出苦? 187.爲除諸障故,迴心避邪途;並於正所緣,恆常修三昧。

### 第九品 智慧

- 1. 此前諸要目,佛爲智慧說;故欲息苦者,當起空性慧。
- 2. 世俗與勝義,許之爲二諦;勝義非心境,説心是世俗。
- 3. 世見二種人:瑜伽師一般。一般世間師,前者所論破。
- 4. 復因慧差别,層層更超勝。以二同許喻,爲果不深察。
- 5. 世人見世俗,分别爲真實,而非如幻化,故諍瑜伽師。
- 6. 色等現量境,共稱非智量;彼等誠虛偽,如垢而謂淨。
- 7. 爲導世間人,佛說無常法;真實非刹那。豈不違世俗?
- 8. 瑜伽量無過。待俗謂見真,否則觀不淨,將違世間現。
- 9. 供幻佛生德,如供實有佛。有情若如幻,死以云何生?
- 10. 眾緣聚合已,雖幻亦當生。云何因久住,有情成實有?
- 11. 幻人行殺施,無心無罪福。於有幻心者,則生幻罪福。
- 12. 諸咒無情識,不生如幻心;種種因緣生 種種如幻物。
- 13. 一緣生一切,畢竟此非有。勝義若涅槃,世俗悉輪迴,
- 14. 則佛亦輪迴,菩提行何用?諸緣若未絕,縱幻亦不滅;
- 15. 諸緣若斷絕,俗中亦不生。亂識若亦無,以何緣幻境?

- 16. 若許無幻境,心識何所緣?所緣異實境,境相即心體。
- 17. 幻境若即心,何者見何者?世間主亦言:心不自見心。
- 18. 猶如刀劍鋒,不能自割自。若謂如燈火,如實明自身。
- 19. 燈火非自明,暗不自蔽故。如晶青依他,物青不依他;
- 20. 如是亦得見 識依不依他。非於非青性,而自成青性。
- 21. 若謂識了知,故説燈能明;自心本自明,由何識知耶?
- 22. 若識皆不見,則明或不明,猶如石女媚,說彼亦無義。
- 23. 若無自證分,心識怎憶念?心境相連故,能知如鼠毒。
- 24. 心通遠見他,近故心自明。然塗鍊舊藥,見瓶不見藥。
- 25. 見聞與覺知,於此不遮除。此處所遮者,苦因執諦實。
- 26. 幻境非心外,亦非全無異。若實怎非異?非異則非實。
- 27. 幻境非實有,能見心亦然。輪迴依實法,否則如虛空。
- 28. 無實若依實,云何有作用?汝心無助緣,應成獨一體。
- 29. 若心離所取,眾皆成如來。施設唯識義,究竟有何德?
- 30. 雖知法如幻,豈能除煩惱?如彼幻變師,亦貪所變女。
- 31. 幻師於所知,未斷煩惱習,空性習氣弱,故見猶生貪。
- 32. 若久修空性,必斷實有習;修空亦非實,復斷空性執。
- 33. 觀法無諦實,不得諦實法;無實離所依,彼豈住心前?
- 34. 若實無實法,悉不住心前,彼時無餘相,無緣最寂滅。
- 35. 摩尼如意樹,無心能滿願;因福與宿願,諸佛亦現身。
- 36. 如人修鵬塔, 塔成彼即逝; 雖逝經久遠, 滅毒用猶存。
- 37. 隨修菩提行,圓成正覺塔;菩薩雖入滅,能成眾利益。
- 38. 供佛無心物,云何能得果?供奉今昔佛,經説福等故。
- 39. 供以真俗心,經說皆獲福;如供實有佛,能得果報然。
- 40. 見諦則解脫,何需見空性?般若經中說:無慧無菩提。
- 41. 大乘若不成,汝教云何成?二皆許此故。汝初亦不許。
- 42. 依何信彼典,大乘亦復然。二許若成真,吠陀亦成真。
- 43. 小諍大乘故。外道於阿含,自他於他教,互諍悉應捨。
- 44. 若語入經藏,即許爲佛説;三藏大乘教,云何汝不許?

- 45. 若因不解一,一切皆有過;則當以一同,一切成佛說。
- 46. 諸聖大迦葉,佛語未盡測,誰因汝不解,廢持大乘教?
- 47. 若僧爲敎本,僧亦難安住;心有所緣者,亦難住涅槃。
- 48. 斷惑若即脱,彼無間應爾。彼等雖無惑,猶見業功能。
- 49. 若謂無愛取,故定無後有;此非染污愛,如癡云何無?
- 50. 因受緣生愛。彼等仍有受,心識有所緣,受仍住其中。
- 51. 若無空性心, 暫滅惑復生, 猶如無想定;故應修空性。
- 52. 為度愚苦眾,菩薩離貪懼,悲智住輪迴,此即悟空果。
- 53. 不應妄破除 如上空性理。切莫心生疑,如理修空性。
- 54. 空性能對治 煩惱所知障,欲速成佛者,何不修空性?
- 55. 執實能生苦,於彼應生懼;悟空能息苦,云何畏空性?
- 56. 實我若稍存,於物則有懼;既無少分我,誰復生畏懼?
- 57. 齒髮甲非我,我非骨及血,非涎非鼻涕、非膿非膽汁。
- 58. 非脂亦非汗,非肺亦非肝,我非餘内臟,亦非屎與尿。
- 59. 肉與皮非我,脈氣熱非我,百竅亦復然,六識皆非我。
- 60. 聲識若是常,一切時應聞;若無所知聲,何理謂識聲?
- 61. 無聲若能知,則樹亦應知;是故定應解:無境則無知。
- 62. 若謂彼知色,彼時何不聞?若謂聲不近,則知識亦無。
- 63. 聞聲自性者,云何成眼識?一人成父子,假名非真實。
- 64. 憂喜闇三德,非子亦非父。彼無聞聲性,不見彼性故。
- 65. 如伎異狀見;是識即非常。謂異樣一體;彼一未曾有。
- 66. 異樣若非真,自性復爲何?若謂即是識,眾生將成一。
- 67. 心無心亦一,同爲常有故。差殊成妄時,何爲共同依?
- 68. 無心亦非我,無心則如瓶。謂合有心故,知成無知滅。
- 69. 若我無變異,心於彼何用?無知復無用,虛空亦成我。
- 70. 若我非實有,業果繫非理;已作我既滅,誰復受業報?
- 71. 作者受者異,報時作者亡。汝我若共許,諍此有何義?
- 72. 因時有見果,此見不可能。依一相續故,佛説作者受。
- 73. 過去未來心,俱無故非我。今心若是我,彼滅則我亡。

- 74. 猶如芭蕉樹,剝析無所有;如是以慧觀,覓我見非實。
- 75. 有情若非有,於誰起悲愍?立誓成佛者,因癡虛設有。
- 76. 無人誰得果?許由癡心得。爲息眾生苦,不應除此癡。
- 77. 我慢痛苦因, 惑我得增長。謂慢不能除; 修無我最勝。
- 78. 身非足小腿,腿臀亦非身,腹背及胸肩,彼等復非身。
- 79. 側肋手非身,腋窩肩非身,内臟頭與頸,彼等皆非身, 此中孰爲身?
- 80. 此身遍散在 一切諸肢分,分復住自分,身應住何處?
- 81. 若謂吾一身,分住手等分;則盡手等數,應成等數身。
- 82. 内外若無身,云何手有身?手等外無它,云何有彼身?
- 83. 無身因愚迷,於手生身覺。如因石狀殊,誤彼爲眞人。
- 84. 眾緣聚合時,見石狀似人。如是於手等,亦見實有身。
- 85. 手復指聚故,理當成何物?能聚由聚成,聚者猶可分。
- 86. 分復析為塵,塵析為方分,方分離部分,如空無微塵。
- 87. 是故聰智者,誰貪如夢身?如是身若無,豈貪男女相?
- 88. 苦性若實有,何不損極樂?樂實則甘等 何不解憂苦?
- 89. 若謂苦強故,不覺彼樂受。既非領納性,云何可謂受?
- 90. 若謂有微苦;豈非已除苦?謂彼即餘樂;微苦豈非樂?
- 91. 倘因逆緣故,苦受不得生,此豈非成立:分别受是孰?
- 92. 故應修空觀 對治實有執。觀慧良田中,能長瑜伽食。
- 93. 根境若間隔,彼二怎會遇?無隔二成一,誰復遇於誰?
- 94. 塵塵不相入,無間等大故。不入則無合,無合則不遇。
- 95. 無分而能遇,云何有此理?若見請示我,無分相遇塵。
- 96. 意識無色身,遇境不應理。聚亦無實故,如前應觀察。
- 97. 若觸非真有,則受從何生?何故逐塵勞?何苦傷何人?
- 98. 若見無受者,亦無實領受,見此實性已,云何愛不滅?
- 99. 所見與所觸,性皆如夢幻。與心俱生故,受非心能見。
- 100.後念唯能憶,非能受前心;不能自領納,亦非它能受。
- 101.畢竟無受者,故受非真有。誰言此幻受,能害無我聚?

```
102. 意不住諸根,不住色與中,不住内或外,餘處亦不得。
103.非身非異身,非合亦非離,無少實性故;有情性涅槃。
104.離境先有識,緣何而生識?識境若同時,已生何待緣?
105.識若後境起,緣何而得生?故應不能知:諸法實有生。
106.若無世俗諦,云何有二諦?世俗若因他,有情豈涅槃?
107.此由他分别,彼非自世俗。後認定則有,否則無世俗。
108.分别所分别,二者相依存。是故諸觀察,皆依世共撐。
109.以析空性心,究彼空性時,若復究空智,應成無窮過。
110.悟明所析空,理智無所依。無依故不生,説此即涅槃。
111.心境實有宗,理極難安立。若境由識成,依何立識有?
112.若識由境成,依何立所知?心境相待有,二者皆非實。
113.無子則無父,無父誰生子?父子相待有,如是無心境。
114.如芽從種生,因芽知有種。由境所生識,何不知有境?
115.由彼異芽識,雖知有芽種,然心了境時,憑何知有識?
116.世人亦能見 一切能生因,如蓮根莖等 差别前因生。
117.誰作因差别?由昔諸異因。何故因生果?從昔因力故。
118.自在天是因:何為自在天?雖許謂大種,何必唯執名?
119.無心大種眾、非常亦非天、不淨眾所踐,定非自在天。
120.彼天非虛空,非我前已破。若謂非思議;說彼有何義?
121.何爲所欲生?我及自在天、大種豈非常?識從所知生,
122.復緣無始業。何爲彼所生?若謂因無始;彼果豈有始?
123.彼既不依他,何故不常作?若皆彼所造,則彼何所需?
124. 若依緣聚生,生因則非彼。緣聚定緣生,不聚無生力。
125.若非自在欲,緣生依他力。若因欲乃作,何名自在天?
126.微塵萬法因,於前已破訖。常主眾生因,數論師所許。
127.喜樂憂與闇,三德平衡狀,說彼為主體;失衡變眾生。
128.一體有三性,非理故彼無。如是德非有,彼復各三故。
129.若無此三德,杳然不聞聲。衣等無心故,亦無苦樂受。
130. 謂法具因性; 豈非已究訖? 汝因具三德, 從彼不生布。
```

- 131.若布生樂等,無布則無樂;故樂等常性,畢竟不可得。
- 132.樂等若恆存,苦時怎無樂?若謂樂衰減;彼豈有強弱?
- 133. 捨粗而變細,彼樂應非常。如是何不許:一切法非常?
- 134.粗既不異樂,顯然樂非常。因位須許有,無終不生故。
- 135.顯果雖不許,隱果仍許存。因時若有果,食成噉不淨。
- 136.復應以布值,購穿棉花種。謂愚不見此,然智所立言,
- 137.世間亦應知。何故不見果。世見若非量,所見應失真。
- 138.若量皆非量,量果豈非假?故汝修空性,亦應成錯謬。
- 139.未辨假立實,不識彼無實。所破實既假,無實定亦假。
- 140.如人夢子死,夢中知無子,能遮有子想,彼遮亦是假。
- 141.如是究諸法,則知非無因,亦非住各别、合集諸因緣;
- 142.亦非由他生;非住非趨行。愚癡所執諦,何異幻化物?
- 143. 幻物及眾因 所變諸事物,應詳審觀彼,何來何所之?
- 144.緣合見諸物,無因則不見。虛偽如影像,彼中豈有真?
- 145.若法已成有,其因何所需?若法本來無,云何需彼因?
- 146.縱以億萬因,無不變成有。無時怎成有?成有者爲何?
- 147.無時若無有,何時方成有?於有未生時,是猶未離無。
- 148.倘若未離無,則無生有時。有亦不成無,應成二性故。
- 149.自性不成滅,有法性亦無。是故諸眾生 畢竟不生滅。
- 150. 眾生如夢幻,究時同芭蕉。涅槃不涅槃,其性悉無别。
- 151.故於諸空法,何有得與失?誰人恭敬我?誰復輕蔑我?
- 152.苦樂由何生?何足憂與喜?若於性中覓,孰爲愛所愛?
- 153.細究此世人,誰將辭此世?孰生孰當生?孰為親與友?
- 154.何不齊受持:一切似虛空?世人欲求樂,然由爭愛因, 頻生煩亂喜。
- 155.勤求生憂苦、互諍相殺戮,造罪艱困活。
- 156.雖數至善趣,頻享眾歡樂,死已墮惡趣,久歷難忍苦。
- 157.三有多險地,於此易迷真,迷悟復相違,生時盡迷真;
- 158. 將歷難忍苦 無邊如大海。苦海善力微,壽命亦短促。

159.汲汲為身命,強忍飢疲苦,昏眠受他害,伴愚行無義。 160.無義命速逝,觀慧極難得。此生有何法,除滅散亂習。 161.今生魔亦勤,誘墮大惡趣。今生邪道多,難卻正法疑。 162.暇滿難再得,佛世難復值,惑流不易斷,嗚呼苦相續! 163.輪迴雖極苦,癡故不自覺。眾生溺苦流,嗚呼堪悲愍! 164.如人數沐浴,復數入火中;如是雖極苦,猶自引為樂。 165.如是諸眾生,度日若無死。今生遭弒殺,後世墮惡趣。 166.自集福德雲,何時方能降 利生安樂雨,為眾息苦火? 167.何時心無緣,誠敬集福德,於執有眾生,開示空性理?

### 第十品 迴向

- 1. 造此入行論,所生諸福善,迴願諸眾生,悉入菩薩行!
- 2. 周遍諸方所,身心病苦者,願彼因吾福,得樂如大海!
- 3. 願彼盡輪迴,終不失安樂!願彼皆獲得 菩薩相續樂!
- 4. 願諸世間界,所有諸地獄,彼中眾有情,悉獲極樂喜!
- 5. 願彼寒獄暖!亦願菩薩雲 飄降無邊水,清涼炙熱苦!
- 6. 願彼劍葉林,悉成美樂園!鐵刺樹枝幹,咸長如意枝!
- 7. 願獄成樂園,飾以鷗鵝雁、悦音美非禽、芬芳大蓮池!
- 8. 願煨成寶聚,燒鐵成晶地!怖畏眾合山,成佛無量宮!
- 9. 岩漿石兵器,悉成散花雨!刀兵相砍殺,化為互投花!
- 10. 陷溺似火燃 無極大河眾,皮肉熔蝕盡,骨露水仙白。 願彼因吾福,得獲妙色身,閒浴天池中,天女共悠游。
- 11. 云何獄中隼、卒鷲頓生懼?誰有此妙力,除暗生歡喜? 思已望空際,喜見金剛手。願以此欣喜,遠罪隨密跡!
- 12. 願獄有情見 香水拌花雨,自天迅飄降,熄滅熾獄火。 安樂意喜足,心思何因緣?思時望空際,喜見聖觀音!
- 13. 願獄眾有情,歡呼見文殊:友朋速來此!吾上有文殊, 五髻光燦燦,已生菩提心,力能滅諸苦,引樂護眾生, 令畏盡消除,誰願捨彼去?

- 14. 彼居悦意宫,天女齊歌頌,著冠百天神,齊禮蓮足前; 花雨淋髻頂,悲淚潤慈目。
- 15. 復願獄有情,以吾善根力,悉見普賢等,無礙菩薩雲, 飄降芬芳雨,清涼復安樂;見已彼等眾,由衷生歡喜!
- 16. 願彼諸旁生, 免遭強食畏!復願餓鬼獲 北俱盧人樂!
- 17. 願聖觀世音,手出甘露乳,飽足餓鬼眾,永浴恆清涼!
- 18. 願盲見行色, 聾者常聞聲! 如彼摩耶女, 孕婦產無礙!
- 19. 願裸獲衣裳, 飢者得足食, 渴者得淨水、妙味諸甘飲!
- 20. 願貧得財富,苦者享安樂!願彼絕望者,振奮意永固!
- 21. 願諸病有情,速脱疾病苦!亦願眾生疾,畢竟永不生!
- 22. 願畏無所懼,縛者得解脱!弱者力強壯,心思互饒益!
- 23. 願諸營商賈,處處皆安樂!所求一切利,無勞悉成辦!
- 24. 願諸航行者,成辦意所願,安抵河海岸,親友共歡聚!
- 25. 願迷荒郊者,幸遇諸商旅,無有盜虎懼,無倦順利行!
- 26. 願天慈守護 無路險難處,老弱無怙者,愚癡顛狂徒!
- 27. 願脫無暇難,具信慈愛慧,食用悉富饒,時時憶宿命!
- 28. 受用願無盡,猶如虛空藏!無諍亦無害,自在享天年!
- 29. 願卑寒微士,容光悉煥發!苦行憔悴者,健朗形莊嚴!
- 30. 願世嬌弱女,悉成男子漢!寒門晉顯貴,慢者轉謙遜!
- 31. 願諸有情眾,因吾諸福德,悉斷一切惡,常樂福善行!
- 32. 願不捨覺心,委身菩提行,諸佛恆提攜,斷盡諸魔業!
- 33. 願諸有情眾,萬壽永無疆!安樂度時日,不聞死歿名!
- 34. 願於諸方所, 遍長如意林, 充滿佛佛子 所宣妙法音!
- 35. 普願十方地,無礫無荆棘,平坦如舒掌,柔軟似琉璃!
- 36. 願諸菩薩眾,安住聞法眷,各以妙功德,莊嚴佛道場!
- 37. 願諸有情眾,相續恆聽聞 鳥樹虛空明 所出妙法音!
- 38. 願彼常值佛,以及諸佛子,並以無邊雲,獻供眾生師!
- 39. 願天降時雨,五穀悉豐收!仁王如法行,世事皆興隆!
- 40. 願藥具速效, 咒語咸靈驗!空行羅刹等, 悉具慈悲心!

- 41. 願眾無苦痛,無病未造罪!無罪不遭輕,畢竟無不樂!
- 42. 願諸伽藍寺,讀誦以興盛!僧伽常和合,僧事悉成辦!
- 43. 願欲學比丘,悉住阿蘭若,斷諸散亂已,輕安堪修善!
- 44. 願尼得利養,斷諍遠諸害!如是眾僧尼,戒圓無缺憾!
- 45. 犯者願生悔,時時懺罪業!壽盡生善趣,不復失禁戒!
- 46. 願智受尊崇,化緣皆得足,身心悉清淨,令譽遍諸方!
- 47. 願離惡趣苦,以及諸艱困,復以勝天身,迅速成正覺!
- 48. 願諸有情眾,慇懃供諸佛,依佛無邊福,恆常獲安樂!
- 49. 菩薩願如意,成辦眾生利!有情願悉得,怙主慈護念!
- 50. 獨覺聲聞眾,願獲涅槃樂!
- 51. 未登極喜前,願蒙文殊恩,常憶已宿命,出家恆爲僧!
- 52. 願吾菲飲食,維生充體能!世世願恆得 圓滿寂靜處!
- 53. 何世欲閱藏,或欲問法義,願我無礙障,面見文殊尊!
- 54. 爲於十方際,成辦有情利,吾行願得如 文殊圓滿行!
- 55. 乃至有虚空,以及眾生住,願吾住世間,盡除眾生苦!
- 56. 眾生諸苦痛,願悉報吾身!願因菩薩德,眾生享安樂!
- 57. 願除苦良藥,一切安樂源---教法得護持,長久住世間!
- 58. 禮敬文殊尊, 恩生吾善心; 亦禮善知識, 恩長吾三學。